

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
«ՎԱՐՊԵՏԱՅ ԴՊՐՈՑ» ՀԱՅՈՐԴՅԱՅ ՏԱՆ ԲԱՅՍԱՆ ԱՌԻԹՈՎ

(24 սեպտեմբերի 2017 թ., Երևան)

*Մեծարգո՝ նախագահ Հայաստանի Հանրապետության,
Գերաշնորհ, հոգեշնորհ եւ արժանապատիվ հայրեր,
Մեծարգո՝ բարերարներ ու ներկաներ,*

Գոհություն եմք բարձրացնում առ Աստված, որ այսօր ականատեսն ենք եւս մի նոր հայրենաշեն ձեռնարկի իրագործման: Մեր ուրախության այս պահին խառնվում են նաեւ հաճելի հիշողություններ դեռեւս Մեր՝ Արարատյան հայրապետական թեմի առաջնորդական փոխանորդության ժամանակաշրջանից, երբ ձեռք բերեցինք առաջնորդարանի մերձակայքում գտնվող այս շենքը՝ ծրագրելով վերակառուցել այն՝ իբրեւ մի նոր Հայորդյաց տուն: Փառք Երկնավորին, որ շուրջ 20 տարի անց Մեր ծրագիրն այլեւս իրականություն է դարձել «Երեւան իմ սեր» ծրագրի նախագահ Տիար Արմեն Սարգսյանի ջանքերի շնորհիվ: Այսուհետ այս գեղեցիկ ու հարմարավետ հաստատության հարկի ներքո նվիրյալ մանկավարժների առաջնորդությամբ գիտելիքներ եւ հմտություններ պիտի ձեռք բերեն ու կրթվեն հազարավոր մանուկներ եւ պատանիներ:

Հիմնադրման օրվանից Հայաստանյայց Եկեղեցու առաքելության կարեւորագույն մասը կազմել են լուսավորության կրթական նվիրական գործն ու մանկանց դաստիարակությունը՝ հավատարիմ տերունական պատգամին՝ «Ով մանուկներին ընդունում է իմ անունով, ինձ է ընդունում» (Մարկ. Թ. 36): Հայ Եկեղեցին առանձնակի ջանքեր է գործադրել մատաղ սերնդին լավագույն կրթություն ապահովելու համար: Քրիստոնեական դաստիարակությունն ու հայեցի կրթությունը, որը խնամեց մեր Եկեղեցին, սյուներն են մեր ժողովրդի հարատեւության ու առաջընթացի: Այս տեսլականով են ազգային-եկեղեցական մեր կյանքում ստեղծվել հայ մանկավարժության ու դաստիարակության պսակը հանդիսացող դպրոցներն ու վարժարանները, որտեղ մեր զավակունք հաղորդ են դարձել մեր հոգեւոր-ազգային անանց արժեքներին ու հայոց պատմության փառավոր էջերին: Նոր սերնդի կրթության ու դաստիարակության

աստվածահաճո այս առաքելությունն իր մասնակցությունը բերելու ազնիվ զգացումով է, որ դեռեւս երկու տարի առաջ մեր Եկեղեցու նվիրյալ զավակ ու բարերար, Մեծ Բրիտանիայում ՀՀ դեսպան Տիար Արմեն Սարգսյանն առաջարկ ներկայացրեց «Երեւան իմ սեր» ծրագրի շրջանակներում վերակառուցելու եւ ավարտին հասցնելու այս շինությունը՝ որպէս Ֆիզիկական սահմանափակ կարողություններ ունեցող երեխաների համար նախատեսված սոցիալ-մշակութային կենտրոն: Նույն ազնիվ մղումով նա, իր իսկ կողմից կառուցած Մայր Աթոռ Ս. Վարդան-Ս. Հովհաննես Մկրտիչ մկրտարանի հարեւանությունը, բարեկարգում է Սուրբ Էջմիածնի այգին՝ այնտեղ ստեղծելով երեխաների համար եւս մի կրթական-մշակութային կենտրոն: Մեկ այլ կրթական կենտրոնի կառուցում Տիար Սարգսյանը ծրագրում է Երեւանի Կոնդի Ս. Հովհաննես եկեղեցու հարակից տարածքում: Կրթական այս հաստատությունը բացման առիթով Մեր բարձր գնահատանքն ենք բերում Մայր Աթոռ Սուրբ Էջմիածնի նվիրյալ բարերարներ Տեր եւ Տիկին Արմեն եւ Նունե Սարգսյաններին, ինչպէս նաեւ կարեւոր այս կրթօջախի հիմնական բարերարներ, Հայ Եկեղեցու բարեգործ զավակներ Տեր եւ Տիկին Հայկ եւ Էլզա Տիտիզյաններին: Ազնիվ ու հավատավոր Տիտիզյան ամուլի կենսագրություն մեջ սա առաջին ազգօգուտ եւ հայրենապաստ նախաձեռնությունը չէ: Նրանց ազնիվ հանձնառությունը կրթական հաստատություններ եւ կենտրոններ են կառուցվել Ամերիկայի Հայոց Արեւելյան ու Արգենտինահայոց թեմերում եւ «Գարեգին Ա.» կրթական կենտրոնը՝ Մայր Աթոռ Սուրբ Էջմիածնում: Ի գնահատումն Տիտիզյան ընտանիքի՝ այս ծրագիրը կյանքի կոչելու գործում կարեւոր ներդրման՝ նորակառույց «Վարպետաց դպրոց» հայորդյաց տունը այսուհետ կրելու է Հայկ եւ Էլզա Տիտիզյան ամուլի անունը: Թող Տիրոջ առատ սերն ու շնորհները հեղվեն մեր սիրելի բարերարների ընտանեկան հարկերից ներս:

Բերկրալի այս առիթով հայրապետական Մեր սերն ու ողջունն ենք բերում բացման արարողության բոլոր մասնակիցներին: Առանձնակի ուրախությամբ ողջունում ենք ներկայությունը ՀՀ նախագահ Տիար Սերժ Սարգսյանի եւ Մեր շնորհակալությունը հայտնում հայրենի իշխանությունների կողմից Հայ Եկեղեցու առաքելությանը ցուցաբերվող մշտական զորակցության համար: Հայրապետական գնահատանքի Մեր խոսքն ենք հղում նաեւ բացման արարողությանը մասնակից բարերար հայորդիներին եւ կենտրոնի բացմանն իրենց ներդրումն ունեցած բոլոր անհատներին եւ կազմակերպություններին:

Չկա ավելի երախտալից ու շնորհակալ գործ, քան մեր ապագայի հուսալի տեսլականի իրագործումը՝ ի դեմս մեր մատաղ սերնդի արժանավայել կրթության: Հայրենաշինության, ազգային ոգու մշտանորոգման եւ պահպանման լավագույն գրավականն են կրթական կենտրոններն ու դպրոցները: Արդ, մնանք հավատարիմ լուսավորության եւ մանկանց կրթության հուսալի առաքելությանը, որը դարեր շարունակ առաջնորդել է քրիստոսասեր մեր ժողովրդին: Աղոթքով առ Աստված Հայցում ենք, որ Տերն իր շնորհներն առատացնի մեր զավակների կյանքից ներս եւ լուսավոր ու պայծառ պահի Հայրենի մեր կրթօջախները: Թող Աստված իր օրհնության ներքո խաղաղ պահի մեր հայրենիքն ու աշխարհասփյուռ ժողովրդին, այսօր եւ հավիտյանս. ամեն:

